



Inatsisartunut ilaasortaq, Per Berthelsen, Siumut

-MAANI

Air Icelandimit unammillerneqarnerup annertunerulernerani Air Greenlandimut sunniutaasussat pillugit § 37 naapertorlugu apeqqummut akissuteqaat

Inatsisartunut ilaasortaq Per Berthelsen, Air Icelandimit unammillerneqarnerup annertunerulernerani Air Greenlandimut sunniutaasussat pillugit apeqquteqarneranut qutsavigaara.

Apeqqutitit matuma kinguliani tulleriiaarneri malillugit akineqarput.

Aallarniutigalugu erseqqissaatigissavara Air Greenland aktiaatileqatigiiffiummat danskit naalagaaffiannit, Namminersorlutik Oqartussanit aammalu SAS-imit pigineqartoq. Air Greenlandip aningaasaqarnikkut atuinissamik aalajangiisarneri aammalu niuernerme periusissai taamaalillutik Naalakkersuisut akisussaaffianiingillat imaluunniit tooqqaannartumik sunniuteqarfigineqarsinnaanatik.

Taamaattumik pingaarnerrinnartigut apeqqutitit akissuteqarfigisinnaavakka. Itisiliinerusumik akissutisinissat kissaatigigukku Air Greenlandimut saaffiginnittariaqarputit.

1. Air Icelandip nunatsinnut nunatsinniillu upernaamut timmisartuussisarnini amerlippagit, qanoq Air Greenlandimut aningaasaqarnikkut kinguneqassava?

Naalakkersuisut eqqumaffigaat assersuutigalugu Air Icelandimit unammillernerup annertunerulernerani, Air Greenlandimut niuerfimmi annaasaqarneq pissutigalugu aningaasaqarnikkut sunniuteqarnerlussinnaasoq. Tamanna ingerlatseqatigiiffiup ingerlataannik annikillilerinermik kinguneqarsinnaavoq taamaalillunilu suliffissat isertitassallu annaaneqarsinnaallutik.

Taamaattorli Naalakkersuisut isumaqarput Air Greenland mannamut ingerlaavartumik naleqqussaasinnaasimasoq taamaalillunilu niuerfimmi atugassarititaasut allanngoraluartut patajaatsumik aningaasaqarnikkut tunngaveqarnerminnik attassiinnarsinnaasimalluni.

2. Air Icelandip timmisartuussisarnini amerlineratigut Air Greenlandimut aningaasaqarnikkut kingunipulititsissappat, qanoq Air Greenlandip aningaasakku kaaviaartitani matussusissavai?

Air Greenlandip kaaviaartitaannut angallaviit kiffartuunneqarnissamut isumaqatigiissummik tunngaveqartut, angallaviit niuernerme kinguneqarnermikkut aammalu attartortitsisarneri il.il. tunngaviupput. Ingerlatseqatigiiffiup ukiuni kingulliinerusuni

24. april 2012
Sagsnr. 2012-064622
Dok. Nr. 889411

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

angallavinni niuernermik tunngaveqartuni ataasiakkaani unammilleqatigiinnerup annertusiartorneranik misigisaqarnerata peqatigisaanik, aamma assersuutigalugu aatsitassarsionermut suliassaqarfimmit ingerlatseqatigiiffiup kiffartuussissutaannik piumanninneq annertusiartorsimavoq.

Oqaatigineqareersutut Naalackersuisut isumaqarput Air Greenland mannamut ingerlaavartumik naleqqussaasinnaasimasoq taamaalillunilu niuerfimmi atugassarititaasut allanngoraluartut patajaatsumik aningaasaqarnikkut tunngaveqarnerminnik attassiinnarsinnaasimalluni.

Air Greenland qanoq iliurluni annaasaqaataasimasinnaasunik aalajangersimasumik matussusiinarnersoq ingerlatseqatigiiffiup nammineerluni aalajangertussaavaa.

3. Air Greenlandip timmisartuussisarneri annikinnerulerpata ilutigisaanillu kaaviaartitai apparpata, nunatsinni angalasunut piffissaq sivikinnerusoq sivisunerusorlu eqqarsaatigalugu qanoq kinguneqassava?

Naalackersuisut isumaqarput Air Icelandip Kalaallit Nunaanni ingerlataasa annertusinerat angallaviit amerlanerulerneranni, tikittartut akulikinnerulerneranni aammalu akiusut appasinnerulerneranni, maannamut Kalaallit Nunaannut aamma Kalaallit Nunaanniit angalasunut iluaqutaasimasoq.

Taamaalillutik ingerlatseqatigiiffiit taakkua maleruagassanik atugassarititaasunillu sapinngisamik assigiinnik malitassaqartillugit, Kalaallit Nunaanni silaannakkut angallannermi suliaqartuusut amerlanerit unammilleqatigiinnissamut periarfissaqarnissaat Naalackersuisut tapersersorpaat. Taamaattorli Kalaallit Nunaanni pissutsit tunngavigalugit silaannakkut angallaviit ilaannaasa kiffaanngissuseqartumik unammilleqatigiiffiginissaannut tunngavissaqarnera sullitanut suliaqartuusunullu iluaqutaasinnaavoq. Angallavinni allani ilaasussanik tunngavissat annikitsuinnaammata ingerlatseqatigiiffiit arlallit iluaqutaasumik ataatsikkut suliaqartuusinnaangillat. Taakkunani unammilleqatigiinneq siunissami suliaqartuusunut marluusunut/tamaginnut ingerlatsinerup pitsaavallaannginneranik kinguneqarsinnaavoq, tamannalu sullitanut kiffartuussinerup ajornerulerneranik aammalu akiusut qaffasinnerulernerannik kinguneqarsinnaavoq.

Naalackersuisut isumaqarput Air Greenlandip Air Icelandimit unammillerneqarnera angallavinni niuernermik tunngaveqartuni pisoq, tassani unammilleqatigiinneq atuisunut iluaqutaalluni. Tamatuma saniatigut maannamut misilittakkat takutippaat Air Icelandip angallavii niuerfinnut allanut Air Greenlandip timmisartuussisarnerisa nalinginnaasumik pisinnaasaannit allaanerusunut periarfissiisimasut. Taamaalilluni Air Icelandip timmisartuussisarneri, sullitanut tunngaviusut pioreersut unammilleqatigiissutiginnarnagit, ilaasunik amerlanerusunik Kalaallit Nunaannukartoqartalerneranut iluaqutaapput.

Taamaattorli Naalackersuisut eqqumaffigaat unammilleqatigiinnerup annertunerulernerana Kalaallit Nunaanni angalasunut sunniuteqarnerlussinnaasoq. Taamaalilluni Air Greenland ullumikkut nunap iluani angallavinni arlalinni, nikerartumik aningaasaqarnikkut imminut akilersinnaassuseqartuni, timmisartuussisarpoq. Tamanna ilaatigut ajornanngilaq, pissutigalugu Air Greenland ullumikkut angallavinnut

ataqatigiissitanut angallaveqarmat, tassani angallaviit ilai ornigassanut allanut ujartuiffigineqarnerusunut ataatsimoortillugit timmisartuussivigineqarsinnaagamik pitsaasumik sullinneqarsinnaalertarmata. Tamaalilluni illoqarfiit arlallit, ilaasunut tunngaviusut ikittuinnaagaluartut kiffartuunneqarnissamut isumaqatigiissuteqarnikkut pingikkaluarlutik, akuttunngitsumik timmisartuussivigineqarlutik sullinneqarsinnaapput.

Naalackersuisut ilisimaaraat angallavinni amerlasuunik ilaasussanik tunngaveqartuni niuerfimmi annaasaqarneq, Air Greenlandip angallavinni aningaasaqarnikkut pilerinaateqannginnerusuni maannakkut timmisartuussisarnerani periarfissanut sunniuteqarnerlussinnaasoq. Tamanna innuttaasunut akiusut qaffasinnerulerneranni tikittartullu akuttunerulerneranni sullissinerup ajornerulerneranik kinguneqarsinnaavoq, imaluunniit angallaviit taakkua tamatumunnga taarsiullugu kiffartuunneqarnissamut isumaqatigiissutit tunngavigalugit timmisartuussivigineqartussanngussappata Nunap karsianut aningaasartuuteqarnerulersitsinnaalluni.

Matuma siuliani oqaatigineqartut tunngavigalugit Naalackersuisut Kalaallit Nunaanni silaannakkut angallannerup ineriartornera qanimut malinnaaffigaat aammalu innuttaasunik sullissinerup ajornerulerneranik malitseqarsinnaasumik imaluunniit nunami ineriartornermut akimmisaartitsisutut isikkoqarsinnaasumik atugassarititaasuni allannguuteqartoqassanersoq eqqumaffiguarlugu.

Inussiarnersumik inuulluaqqusillunga

Jens B. Frederiksen